



偶記卷下

出處

池陽 余翹

聿雲 著

尹三聘而直出有負鼎之誣亮三顧而起有結
眊之譙好事之口可畏哉

曹操嘗徵諸葛亮矣亮自陳不樂出遂謝遣之
曰義不使君辱于汚君之朝也桓温嘗請王猛
俱南矣猛師曰子與桓温不並世也遂止不行
夫操不迫亮温不强猛有度哉今人曰操失亮

溫失猛不學之過也

李令伯之陳情以退為進也于遑遲怨望知之也沈休文之謝病以去為留也于有志台司知之也

邴曼容官過六百石輒自免去也羊敬元仕至二千石便懷止足也令求一罷相避賢者難哉杜衍致仕或勸為居士服衍曰老而謝事尚可竊高士名耶張宗誨致仕其子勸為羽服宗誨曰吾作白頭老監秘書而服何以賀老流沙之

服為

左傳孔文子將攻大叔訪于仲尼仲尼曰胡簋之事則嘗學之矣甲兵之事未之聞也退命駕而行與魯論稍異

辭受

魯人以土斲薄膳進孔子悅而受之楚漁者以魚獻孔子拜而受之齊景公致廩丘為養則不受矣故曰儀不及物曰不享

受絲而藏之閣山巨源也受魚而餒之門傳昭

也受魚而懸之室羊續也受瓜而置于梁蘇瓊也受潤筆物而藏之梁王安石也夫禮有辭受耳矯而好名教子之謂也阮孝緒覆王晏之醬陳無已却趙挺之之衣廉希憲斥阿合馬之糖庶幾士懷耿介不蔭惡木者矣

恩怨

左伯豪薦周舉舉劾之而雄悅也崔良伯薦卻詵詵糾之而洪服也楊越公薦榮毗毗繩其左

右而素謝也並知有君乎合舉主門生互相嗔拂雖曰不黨吾不信也

李邑毀班超漢主以邑付超超遣之不留也高遵陷伊婁謙周主以遵付謙謙待之如故也忠而恕哉

文廣休不薦程瓊而瓊謂其不黨邢子才專毀崔暹而暹謂其不癡

韓愈作諍臣論譏陽城曾誕作玉卮主人對客問譏鄒浩譏者難受譏者尤難

咎犯與虞子羔有仇。晉文問誰可守西河者。咎犯薦羔。羔往謝之。咎犯曰：「薦子公也。」怨子私也。子其去矣。願吾射子也。蓋勲與蘇正和有仇。梁鵠將殺正和。勲掬止之。正和詣勲謝勲不見。曰：「吾為梁使君謀不為蘇正和也。」二子庶幾直報矣。

蘇章與故人飲。而明日按其罪也。源懷與故人飲。而明日竟劾之也。公矣得微近險乎。

董卓誅。而蔡邕嘆。漢武墾遷。而姚崇泣。何其啣

私恩忘公義也。

袁盎之免于阨也。以盜侍兒之從吏。張說之脱于難也。以通侍婢之書生。

唐玄宗時。邊軍於袍內得宮人詩。主將以聞。玄宗即以此宮人賜得詩者。而邊軍感泣。僖宗時。軍人馬真于袍內得宮人詩。主將以聞。僖宗即以宮人妻真。而後僖宗幸蜀。真晝夜捍禦不離。

秦繆公之勝晉也。以食駿馬之野人。趙簡子之勝翟也。以食白驪之胥渠。

顧榮分炙于行炙人而後脫之于亂者行炙人
也陰鏗授酒於行觴者而後挾之于難者行觴
者也故曰與不期衆少

羊斟以羊羹不及而敗宋也司馬子期以羊羹
不及而禍中山也故曰不如公榮者不可不與
飲又庾悅以鷲炙不及劉毅而構禍
中山王失之子期而得之二士魏公子失之范
睢而得之虞卿瑕瑜豈相掩哉
須賈以綈袍贈范睢遂得免死錢勃以紈扇遺

朱買臣遂為上客二子在賈勃術中

朱平原之抹辟陽也陽拒之周伯仁之抹茂弘
也陽詈之辟陽亦憾平原而茂弘竟陷伯仁行
事過異者禍之媒也

左傳尹公佗學射于庾公差庾公差學射于公
孫丁二子為孫氏追衛公公孫丁御公庾公差
射兩鞬而還尹公佗反之公孫丁授公轡而射
之貫臂此與孟子所紀尹公佗庾公斯事類而
大異

奢儉

漢文帝弋綈為裘集上書囊為帳宗高祖用直脚床釘用鐵牀頭有土障壁上挂葛燈籠麻繩拂宋太宗服澣濯衣有穿者命紉補以進仁宗用黃絁被漆唾壺一裘三十年晏子也一熊皮障泥數十年長孫道生也一履三十年虞玩之也董威輦不受全帛而受碎絮李元愷不服新麗而服垢屨王子陽之好增其累耳

漢蕭相國何不治垣室曰後世賢師吾儉不賢母為勢家所奪唐河間王孝恭嫌其居壯麗別營一區曰子也才易以守不才不為他人所利楚王希範作九龍殿閩王鱗作九龍帳皆一時事

起昌陵土與穀同價漢成也起承華土與穀同價慕容熙也寇準家不爇油燈雖庖廩必然炬燭蒲宗孟日燃燭三百宗孟不足道也準累盛美矣。

隋虞孝仁宋孫承祐從征皆以駱駝負水養魚
丁謂從東封以大車載水養魚豪侈哉拓跋燾
不食河南水以駱駝負河北水自隨未足異矣
袁紹之諱騎恥見許子將劉整之車服恥見蔡
子尼揚惜之紫羅袍金縷帶恥見李庶
唐鄭璠在嶺南象江得怪石輦歸榮陽費錢六
十萬宋榮咨道以錢三百萬買虞世南夫子廟
初刻碑
鄭康成婢皆能誦詩劉威碩婢皆令誦靈光殿

賦

評品

王孫對簡子之問也舉觀射父左史倚相昭奚
恤對秦使之問也舉子西太宰子方葉公子高
司馬子反孟獻子對晉宣子之問也舉顏回茲
無靈魏太子對經侯之問也舉徒師沼却辛芒
卯齊威王對梁王之問也舉檀子盼子黔夫種
首寶得其寶者哉
北海邴春少立志操邴邑以為邴原復出王偉

元以為無成後春果以無行廢學也沛國戴晞
少有才智時人許以遠致穆延祖以為無成後
晞果以無行被斥也

漢求仲羊仲號二仲周穉都孫子穉號二穉馮
威卿孺卿號二卿晉謝玄張玄之號二玄梁顏
協顧協號二協

漢皇甫規威明張真然明段熲紀明號涼州三
明金敞元休第五巡文休常端甫休號京兆三
休晉孔愉敬康張茂偉康丁潭世康號會稽三

康劉粹純嘏劉宏終嘏劉漢冲嘏號洛中三嘏
又漢常孟達公孫伯達魏仲達號三達晉諸葛
恢荀闓蔡謨俱字道明亦號中興三明云

周常曼唐常嗣立俱號逍遙公周楞里子漢晁
錯魯匡吳支謙魏桓範俱號智囊唐白樂天宋
郭祥正俱號醉吟先生晉司馬朗懿字旭恂進

通敏及董昶王澄阮瞻胡毋輔之謝鯤庾凱沙
門于法龍光逸俱號八達秦穰侯華陽高陵涇
陽宋蕭道成袁粲褚淵劉彥節北齊孫騰高岳

高隆之司馬子如皆號四貴吳馮延巳馮延魯
陳覺魏岑查文徽宋王欽若丁謂陳彭年劉承
珪林特俱號五鬼漢諸葛亮晉翟湯俱號卧龍
漢董宣高慎宋蕭惠開又漢徐璜俱號卧虎宋
廬陵王禕魏敷城王坦俱號驢王漢嚴延年晉
荀晞俱號屠伯唐邊鎬宋洪皓俱號佛子晉喬
智明陳孔奐皆號神君晉羊曼唐常袞俱號黔
伯周陸通唐陸羽俱號接輿漢賈彪賈琮皆號
賈父晉謝混北齊王晞俱號方外司馬漢黃憲

宋周續之梁徐陵皆號顏子漢張霸齊蔡曇智
~~滕~~曇智滕曇恭梁宗元卿俱號曾子張芝張旭
俱號草聖

荀淑八子皆才人號其里曰高陽劉子玄兄弟
六人皆有名入號其鄉曰高陽

稱千里駒者劉杳也蕭映也任昉也王茂也王
規也丘仲孚也張敷也南史已數見殆不可勝
記

石奮及四子皆二千石號萬石君馮揚八子皆

二千石亦號萬石君秦襲與羣從五人為二千石號萬石秦氏嚴延年母五子皆貴號萬石嚴姬張文瓘及四子皆三品號萬石張家廖剛及四子皆貴號萬石廖氏

潘岳夏侯湛號連璧以容貌也獨孤信常孝寬號連璧以政術也又王敬則王儉同拜儀同徐孝嗣稱為連璧

漢趙后號飛燕以體輕也賊張燕號飛燕以悍捷也

晉有三張載也協也元也以文章名唐有三張廷珪也九齡也休也以政事名

古今兩鮑謝宋鮑照謝朓唐鮑防謝良弼也三李杜漢李膺杜密李固杜喬唐李白杜甫也

漢有兩杜子夏時人謂欽為首杜子夏魏將有

兩夏侯軍中號惇為首夏侯齊有兩江泌世謂士清為孝江泌唐有兩李益時人謂君虞為文

章李益兩韓翃德宗謂君平為詩人韓翃

賀知章稱李白為謫仙周必大稱李壁為謫仙

唐睿宗問蜀士于蘇頲對曰李白文章趙旻術
教宋英宗問蜀士于歐陽脩對曰文章蘇洵經
術黎淳

劉孝儀孝威並工屬文號曰三筆六詩王彬王
志並習篆隸號曰三真六草

劉臻漢聖衛大經易聖張旭草聖楊子華^畫聖嚴
子卿馬綏明棊聖衛協張墨書聖王志書聖張
衡馬忠木聖李白醉聖
賈謐之黨號二十四友而劉琨在其中李逢吉

之黨號八閩十六子而劉栖楚在其中

二傳沈劉不如一丘謂傅琰父子沈憲劉玄明
丘仲孚也以政事言三崔二張不如一康謂崔

暹崔季舒崔昂張亮張徽陳元康也以寵遇言

一見南史一見北史

一臺二妙衛瓘索靖也一臺二絕伏曼容袁粲
也寺中二絕宋世軌蘇珍之也

顧愷之三絕才也畫也癡也梁元帝三絕書也
畫也宣尼贊也鄭虔三絕書也詩也畫也宋令

文三絕文辭也書也力也李暎三絕門地也人物也文章也吳趙夫人三絕針也機也絲也馮吉三絕詩也琵琶也舞也

方於事上好下佞已治身清貞大修計校自好讀書憎人學問却公之三反也方于事上好下佞已性嗜榮貴不求苟合治身不穢尤惜財物王肅之三反也

梁武帝時三慶昭明太子生也徐元瑜降也蕭穎胄暴卒也張元一所謂三慶旱而雨也洛橋

成也郭弘霸死也

黑衣宰相沙門慧琳也白衣宰相令狐滈也
比擬

劉孝標自此馮敬通者三劉子玄自此揚子雲者四

卽侯姜女之生子也始弃之宋苗司徒之生女也始弃之俱命之曰弃卽弃為稷官蒸民賴之宋弃美而生佐幾移于宋國名之同也奚傷此陸龜蒙襍說也

司馬長卿慕蔭相如因以為名傳燮慕南容因以為字然司馬無行傳燮不免愧兩人矣宋有蜀人蔭相如殺劉季連以執報父仇梁有武昌太守朱買臣勸元帝遷都何襲前人姓名乃爾

揚雄子童烏蚤慧而先雄天宋王彧子亦字童烏蚤慧而亦先彧卒

齊武改董蠻為董仲舒曰今日仲舒何如昔日仲舒對曰昔日仲舒出自私廬今日仲舒降自

天帝梁武謂令李膺何如昔李膺對曰昔事桓靈之主今逢堯舜之君此足資嘖耳又周太祖賜伊婁穆名伊尹更可笑

慕太白者李碧字太碧慕樂天者黃居難字樂地尤足鼓掌又有慕李白之李赤為廁鬼惑死

蜀王昭遠自比諸葛亮兵敗流涕曰運去英雄不自由也宋郭倪自比諸葛亮兵敗流涕客曰此帶汁諸葛亮也可咲殊類

欲與光武爭中原者石勒也恨不與劉項爭中

原者劉毅也知量難哉
趙文深學王褒之書僧皎然希蘇州之句效顰
益媿學步失故者乎

嫌疑

馬援還自交趾載薏苡一車諧者以為明珠也
唐瑾還自江陵載書二車諧者以為珍玩也
漢吳恢寫書子祐曰此書若成載之無兩嫌疑
之間誠先賢所慎也齊郎基寫書潘子義遺之
書曰在官寫書亦是風流罪過噫况出於書之

外者乎

任誕

牛飲者紂也閩王曦也新序載桀亦為牛飲
晉嵇阮劉畢為裸飲唐鄭愚劉彥等為顛飲宋
劉潛石曼卿為巢飲鼈飲猶曰放達也周伯仁
露其醜穢及元康貴游子弟為散髮飲對弄妾
婢何止貌不恭哉
鄭泉曰願得美酒滿五百斛船四時并脆置兩
頭左右沒飲之憊即啖肴膳酒減隨盃不亦快

手畢卓曰頭得酒滿數百斛船四時其味置兩
頭右手持酒杯左手持蟹螯拍浮酒船中足了
一生矣

與宴不醉因詣道邊酒壚停車褰幔與三騶對
飲者謝幾卿也步彘郊野道遇一人即與酣飲
者袁粲也二子位任隆重何得不檢乃爾

阮籍劇飲而母死則嘔血數升毀瘠骨立劉潛
劇飲而母死則一慟而絕

居母喪飲酒食烝豚以步兵厨有酒三百石乃

求為步兵校尉者阮籍也居母喪飲酒騎射以
太常有音樂多美酒復自中書令求為太常者
李元忠也元忠效籍耳

杜少陵窘于嶽祠非耒陽令不還也韓昌黎窘
於青坨坪非華陰令不下也

徑入人園林不問其主嘯咏自若者王子猷也
子敬也袁景倩也子猷景倩皆為主人款晉而
子敬獨為顧辟疆所數驅之出門何不幸也
漢陳遵與客飲輒投轄閉門有部刺史奏事值

遵飲大窮突入叩頭白遵母恐誤尚書之期遵
母乃令從後門出齊高季式閉門與司馬消難
飲番一宿消難恐誤朝參拜謝求出季式怒以
車輪括其頸引滿飲之復番一宿乃出之又季
式嘗醉殺孫搦

嚴憚

魏崔楷摧挫豪彊時人語曰莫獺獬付崔楷宋
高祖每除異已必令丁旡拉殺時人語曰莫跋
扈付丁旡齊主道成亦然其所任桓康也時人

語曰欲輒張付桓康宋又有奚顯度者苛虐無
道時人語曰勿反顧付奚顯度魏唐永為北地太
守時人語曰莫陸梁恐爾逢唐將

寧飲三斗醋不見崔宏度寧食三斗葱不見屈
突通寧炙三斗艾不見屈突蓋寧食三斗炭不
逢楊德幹寧飲三斗塵無逢權懷恩寧作五年
徒不逐王玄謨皆時人語也

魏人語曰曹公尚可趙達殺我蜀人語曰蜀賊
尚可羅尚殺我宋人語曰玄謨猶自可宗越更

殺我

匈奴為偶人象卸都令騎馳射皆莫能中蒼梧
為偶人象蕭道成令左右射皆莫能中

石勒將麻秋胡宋劉胡齊武將桓康魏楊大眼
隋麻叔謀唐却玘人皆以名怖小兒

病瘡者稱桓石虔之名無不立愈盡桓康之形
于牀壁亦立愈取朱瑾墳上土以水脈之亦即
愈異哉

吳苦岑昏酷虐孫皓嘗戲曰當以奴謝百姓左

右因曰唯共起收殺之宋苦奚顯度酷虐廢帝
嘗戲言曰比當除之左右因即日宣殺焉

悖陋

為爾寂寂鄧禹笑人王元長之言也為爾寂寂
文景笑人桓宣武之言也克此之心不至無上
不巳也

公孫述將僭號夢十二為期其妻曰朝聞道夕
死可矣李壽將僭號筮得數在曰朝聞道夕死
可矣荀伯玉聞相墓者之言欲得暴貴也范雲

當梁武九錫之拜欲速愈疾也並為是語小人侮聖言可恨哉

漢桓榮為少傅乃大會諸生陳其車馬印綬曰今日所蒙稽古之力也可不勉哉魏董徵為刺史乃置酒高會大亨邑老曰此之富貴匪自天降乃勤學所致耳二子謬廁儒林鄙陋乃爾王思暲執筆作書蠅集筆端思怒自起逐蠅不得還取筆蹋壞之王述嘗食雞子以筋刺之不得便大怒舉以擲地雞子圓轉不已仍以屐齒

蹠之又不得復取內口中齧破吐之卞急如此可嘆哉然二子自名士不以一青棄也

庾炳之好潔士夫造之者未出戶輒令人拭席洗牀何敬容衣冠鮮麗有不整伏牀熨之暑月背為之焦殷冲好淨小史非淨浴新衣不得近左右謝景仁居宇淨麗每唾輒唾左右人衣事畢聽一日澣濯王思遠有客詣之必形儀新楚乃與促膝去後猶令二人交帚拂其坐處劉澄為遂安令掃拂郭邑路無橫草水翦虫穢民不

堪命王維好掃地兩僮專掌縛帚而時不給何
佟之一日洗滌十餘遍猶恨不足人號水淫蒲
宗孟每日有小洗面大洗面小濯足大濯足一
浴至湯五斛汪性南以杖杜為杖杜蕭吳以伏臘為伏獵謝
李林甫汪性南以杖杜為杖杜蕭吳以伏臘為伏獵謝
以祇受為抵授程覃以照執為昭執
宋主謂謝超宗殊有鳳毛劉道隆因請鳳毛見
之齊源師言龍見請雩祀高阿那肱驚問龍色
何如武人若此不足責矣

宋劉義綦聞人言陸士衡曰下官初不識陸士
衡趙宋党進聞人說韓信曰對韓信亦說我笑
晉惠帝問蛙鳴為官乎為私乎荅曰在官曰既
在官可給廩梁廬陵王應見金鉞問可食乎荅
曰不可曰既不可食並特乞汝

反覆

富貴多士貧賤寡交不見朝趨市者孟嘗君之
客之言也天下以市道交有勢則從無勢則去
廉將軍之客之言也可以告客人者不可以告

客于人者

長平故人移於冠軍魏其吏士歸于武安猶積
漸也王珣兒婚賓客甚衆聞王稚拜少傳迴車
者過半則呼吸變遷矣

呂布事丁原則殺丁原事董卓則殺董卓劉牢
之事王恭則反王恭事司馬元顯則反元顯司
馬消難事齊則叛齊事周則叛周

彭樂敗宇文泰泰曰今日無我明日豈有汝邪
樂遂歸慕容紹宗敗侯景景曰若就擒公復何

用紹宗遂縱之劉巨容敗黃巢曰朝廷喜負人
不若留賊為富貴資遂釋之

事十主以諛取貴叔孫通也事十主以諛取寵
馮道也諸生稱通為聖人當世譽道為孔子鄉
原之媚于人如此

馮道事十主作長樂老叙宋琪事四朝作多幸
老民叙

公孫初諫通西南夷置滄海築朔方武帝令朱
買臣難以十策弘乃謝曰山東鄙人不知其便

若是楊元素初言助役之害王安石令曾布詰以十難元素惶恐請曰臣愚不知其便乃爾噫此汲長孺劉忠肅為錚錚也

諂佞

○為母作驢鳴戴良也為韓侂胄作犬吠趙師韞也為父嘗糞庾黔婁也為魏元忠嘗便液郭弘霸也流芬遺臭毫厘千里趙師韞字從善號墻謂其無犬吠事乃鄭斗所造以報捷武學生之憤未知果否董賢拜大司馬用文有允執厥中語蕭咸以為

堯禪舜之詞也史彌遠拜相制文有昆命元龜語倪思以為舜命禹之詞也小人媚權曷不至哉

○何尚之以吏部郎告休傾朝送別叔度曰此送吏部郎耳非關何彦德也高爽嘗經晉陵縣令劉蒨了不相接及爽代蒨為縣迎贈甚厚爽曰此餉晉陵令耳何關爽事
○劉義康之楫大于供御者三寸秦檜之子魚大于宮中者百尾皆以寵見媚也

檀長卿為沐猴舞以媚許伯揚再思為高麗舞
以媚張同休公風舞事

徐之才縱其妻通和士開紀處訥縱其妻通武
三思

或以納妾求知或以售妹入府或以獻妻入閣
此華岳論韓侂胄疏語也今人但知程松納妾
事耳岳吾池人初論侂胄被竄後論史彌遠被
害楊用脩載岳此疏而曰倪僕以售妹入府不
知郭倪郭僕兩人也不考乃爾

孔光沐日歸休燕語不及朝省事宇文士及嘗
被馳召妻問不敢言故佞人眷密無取矣又唐
楊師道慕孔光為人語禁省事宋謝弘微不
言帝所御膳羞

西京亡于張禹東京亡于胡廣能臣甚于篡也
語出權德輿

殘忍

羊囊乘血仰而射之名曰射天者武乙也宋王
偃也作炮烙之刑者桀也紂也桀作炮烙見符

子

○魏奚康生以天旱使人拔西門豹舌。齊文宣以天旱毀西門豹祠，掘其冢，何豹之不幸也。坐中殺人數百，斷舌，斬手足，鑿眼，目宛轉，杯案間而飲食。自若者，董卓也。方食，斬人於前，言笑自若者，侯景也。每宴，殺人數百，庖宰一如羊豕，而取其膽以吞酒者，趙思綰也。剗剔支解人血流盈前而命樂飲酒自若者，漢蔡王信也。紂剖比干心，觀其七竅，元兇劓剖潘淑妃心，觀

其邪正

○袁紹殺臧洪，陳容在坐，無不嘆息曰：「如何一日戮二烈士，張敬兒殺邊榮，程邕之三軍莫不垂泣，曰：「如何一日殺二義士，張之貪殘，又非袁匹。」○袁紹不用田豐之計而敗，乃曰：「果為所笑。」遂殺豐。趙染不用魯徽之計而敗，乃曰：「何面見之。」遂殺徽。忍而闇哉。

隋麻叔謀五代萇從簡皆好竊民間小兒食之。叔謀食至數百，民間至以小兒藏之櫃，執燭圍

守人類中有此等輩哉

王武子以錢十萬賭王愷八百里牛勝而殺牛
爾朱文略以好婢賭高歸彥七百里馬勝而殺
馬然文略併殺婢以二銀器盛婢頭馬肉以遺
歸彥何異豺狼
後魏咸陽王坦唐巢刺王元吉皆曰寧三日不
食不能一日不獵坦鷹犬數百頭元吉置罔三
十車俱不令終好殺之報也

惑溺

漢文帝夢欲上天不能有黃頭郎從後推之上
天遂尊幸鄧通也陳文帝夢騎馬登山洛危欲
墮陳子高推捧而上遂愛幸子高也二主之事
何其酷肖

乘羊車宮人以鹽汁灑地晉武也乘羊車潘淑
妃以鹹水灑地宋文也二主之治無終此哉
李夫人卒漢武令方士致之步幄也殷淑儀薨
宋武令巫召之帳中也嘻世主之好士有若此
者乎

隋煬刻木為柳，晉孫皓刻木為張美人，去越王金鑄范少伯遠矣。

宋殷貴妃薨，哭悲者厚賞。慕容熙苻后死，百寮哭無淚者，罪之，殊足捧腹也。

石衛尉崇殺身于綠珠，何廣州恢構囂于耀華，喬左司知之失族于竈娘，故曰尤物移人，苟非德義，必有害。

陶穀使江南，以假書為名實，覘之既三，駢甚。韓熙載密遣歌兒秦弱蘭詐為驛卒，女擁帚洒掃。

穀喜而私焉，作風光好一闋贈之，曰：好姻緣，惡姻緣，祇得郵亭一夜眠。別神仙，琵琶撥盡相思調，知音少，待得鸞膠續斷絃。是何年後，數日李主宴，穀出弱蘭于席，歌前闋以侑之。穀大慚而醉，御史何知謁告歸蜀，受密旨伺察文潞公事。潞公遣幕客李少愚迎見于漢州，命酒設樂，有妓王官花善舞，何醉題其項帕曰：按徹梁州更六么，西臺御史惜妖嬈。從令改作王宮柳，舞盡春風萬萬條。後數日至成都，頗嚴重，一日潞公

讌何迎其妓歌前詩以侑觴何為之醉遂不敢
措手而歸二事甚類陶妓一作任杜娘何妓一
作楊臺柳又甚類也

見唐詩文集

見楊唐文集

宋有^見耿娼少年^見嬖之元有^見姬娼大賈悅之嘻士
之遇合豈必賢且才哉

疑懼

涓石梁見已之影以為鬼而驚死犁丘夫人見
已之子以為鬼而刺刃

應柳賜杜宣酒見杯中弩影以為^見樂廣賜客

愈 酒見杯中弓影以為蛇俱因而病後告之故俱

調謔

孫皓作爾汝歌勸晉武帝觴曰昔與汝為隣今
與汝為臣上汝一杯酒令汝壽萬春宋王歆之
作爾汝歌答劉邕曰昔為汝作臣今與比肩既
不勸汝酒亦不願汝年

有犬為獨無犬為蜀橫目苟身虫入其腹無口
為天有口為吳君臨萬邦天子之都吳薛綜對

張奉之言也見本傳有水者濁無水者蜀橫目
苟身虫入其腹無口者天有日者吳下臨滄海
天子帝都其諸葛恪對費禕之言也見江表傳
當是一事兩記

庾爰客謂孫放曰諸孫太盛放曰未若諸庾翼
翼蔡約謂王慈曰衆僧今日可謂虔虔慈曰卿
如此何以興蔡氏之宗謝超宗謂慈曰卿書何
如虔公慈曰如雞比鳳何昂謂殷孚曰益殷萼
羨孚曰何無忌諱各用父名為諱悖哉然超宗

嘗以劉道隆觸其父諱徒跣入內矣此又挑王
慈何也

楊素戲柳機柳昂曰二柳俱摧孤楊獨秀又戲
昂子調曰柳調通躰弱獨搖不須風何素慣為
若語

張蒼梧謂其子曰我不如汝有佳兒其孫憑曰
阿翁柰何以子戲父謝玄亦曰我尚生瑛瑛那
得生靈運許敬宗謂子昂曰我子不若汝子昂
曰渠父寧如昂父

賄敗

衛蒯瞶出奔已氏也曰勿殺我吾與汝璧曰殺爾璧其馬往唐杜孺休見攻沈粲也曰勿殺我吾與汝金曰殺爾金其馬往又梁蕭紀以金擲樊猛曰顧卿送我曰殺足下金其何之石崇臨收曰奴輩利吾財耳曹武臨收曰諸人利吾財貨伎女耳足為居積之鑒

瀆亂

魏楊華為胡后所寵遂有楊白花出齊楊旻為

何后所寵遂有楊叛兒曲二事奇官

武成令胡后與和士開握槊中宗令高后與武三思雙陸

霍光愛幸監奴馮子都其妻顯即與子都亂梁冀愛幸監奴秦宮其妻壽即與宮私

妖冶

薛靈芸初被選與父母別以玉壺承淚至京師壺中淚凝如血楊太真初承恩與父母別泣涕登車時天寒淚結為紅冰

夏姬年踰七十而雞皮三少猶與巫臣生女後
嫁叔向北史胡后年踰不惑而妖蠱若二八武
則天年七十而盛自拂拭不覺衰耗

宋東陽女子婁逞詐為丈夫仕至揚州議曹從
事王蜀女子黃崇嘏作詩上蜀相周庠庠首薦
之屢攝縣吏事精敏

蜀有兩花蓋夫人一王建妾一孟昶妾俱亡國
尤物也孟之花蓋夫人入宋太祖亦惑之為太
宗射死

